

Skroman, uvijek prijatan sagovornik, ali odlučan u borbi za progres. Volio je ljude i rado im je pomagao, sa posebnim zadovoljstvom je pomagao mladim kolegama, a naročito onim koje je zapazio da vole svoju struku i svoj poziv.

Bio je neobično odan svojoj porodici, uzoran i plemenit suprug, nježan i osjećajan otac.

Svojim dugogodišnjim samopregornim radom zadužio je našu zajednicu, nas kolege i saradnike, svoje učenike i studente, zadužio je sve oko sebe, ali nikom nije ostao dužan.

Slava i hvala Zuberu Ranku, dipl.inž.geodezije!

IN MEMORIAM

KEVČIĆ ENES - GEOMETAR

Kevčić Enes rođen je 25. marta 1935. godine u Tuzli. Osnovno obrazovanje stekao je u Tuzli, a Srednju tehničku geodetsku školu je završio je 1961. godine u Sarajevu.

Poslije završene Srednje škole zaposlio se u Rudniku Lipnica. Nakon odlaska JNA ponovno radi u Rudniku Lipnica odakle je prešao u Tehnički sektor Rudnika lignita "Kreka" u Tuzli, a zatim u zajedničke tehničke poslove Titovih rudnika "Kreka-Banovići" u Tuzli. Kada je formirana Osnovna organizacija udruženog rada Istraživanje i razvoj prešao je na rad u ovu organizaciju a prilikom formiranja radne organizacije Rudarsko geološki institut i fakultet u Tuzli svoj rad je udružio u Osnovnoj organizaciji udruženog rada Institut za rudarska istraživanja u Tuzli.

Za svo vrijeme je radio na poslovima rudarsko-geodetskih mjerenja. Član je Saveza komunista od 1963. godine. Biran je u rukovodstva Omladinske organizacije, u Savez sindikata, kao i u organe upravljanja Osnovne organizacije udruženog rada. Bio je član Delegacije OOUR-a i izabran za predsjednika Delegacije. Delegiran je u Skupštinu Samoupravne interesne zajednice - komunalne djelatnosti, a ta Skupština ga je izabrala za svog predsjednika. Rezervni je vojni starješina u činu kapetana i član Odbora rezervnih vojnih starješina u Mjesnoj zajednici.

Kao omladinac aktivno se bavio sportom u Fudbalskom klubu "Sloboda", a kasnije u FK "Radnik" iz Lipnice. U osnovnoj organizaciji je bio aktivan učesnik Radničkih sportskih igara. Još od školskih dana ispoljio je

odlike dobrog druga i prijatelja, želju i spremnost da pomogne drugom. Sa oduševljenjem i uživanjem se svima stavljao na raspolaganje i osjećao se vrlo sretnim kada je nekom bio od pomoći. Zbog svog dobrog odnosa prema drugovima, prijateljima i porodici i to u svim sredinama gdje je živio bio je vrlo omiljen, cijenjen i uživao veliki lični ugled i povjerenje. Svojom vedrinom i srdačnošću plijenio je ljubav svih nas.

Mnoge akcije, a naročito one u oblasti društveno zabavnog i sportskog života, bez njega kao jednog od inicijatora i organizatora nisu se mogle ni zamisliti. Za aktivnost u radu i divnih ljudskih osobina Zbor radnih ljudi OOUR-a Istraživanje i razvoj povodom dana Rudara 1976. godine dodijelio mu je Diplomu za radne vrline.

Smrt ga je zadesila 29. decembra 1977. godine na izvršenju redovnog radnog zadatka na kome je od početka predano radio.

Njegovom smrću Savez geodetskih inženjera i geometara Bosne i Hercegovine i Društvo u cjelini siromašnije je za jednog velikog i plemenitog čovjeka, prijatelja i kolegu koji se u svom životu maksimalno posvetio društvu i ne štedeći sebe davao svoj ogroman doprinos.

Neka mu je vječna slava i hvala!